

Minister Otmar Oduber ta convenci

Hotel na San Nicolas lo crea un spin off enorme

MINISTER Otmar Oduber a splica e pakico e como Minister y su coleganan di Gabinete Mike Eman II ta sostene e proyecto di hotel na San Nicolas.

Ta trata aki di un proyecto di un calidad halto, tanto pa nan infraestructura y servicio y e lo t'e 'kick off' di e economia cu ta practicamente morto na San Nicolas.

E proyecto aki por bay crea e spin off positivo pa pariba di nos isla. E lo trece cune cu lo bin e.o. watersport, companianan di car rental, restaurant, tiendanan, e.o. na San Nicolas specialmente teniendo en cuenta e regimen fiscal cu tin p'e parti aki di nos isla.

Fuera di esey tambe lo crea oportunidadnan laboral specialmente pa nos hendenan di pariba, cu lo tin e bentaha di por traha mas cerca di cas. E inversionistanan di e proyecto ta na Aruba cada dos siman y nan ta reuniendo cu mandatarionan, mientras cu ya caba nan ta den proceso di e raportnan di estudio ambiental, impacto social y economico y demas estudionan necesario.

Minister Oduber ta spera cu den careda di maart-april e construccion di e hotel por cuminsa.

Pa loke ta trata e mall cu lo bin hunto cu e hotel, e mandatario a bisa cu e lo wordo opera dor di localnan y esaki ta trece cune oportunidadnan nobo pa nos hendenan por tin nan propio negoshi.

Crea oportunidad pa trece bida nobo na San Nicolas ta algo cu mester sostene y e Minister ta para 200% su tras y lo pushe p'e sosode. E ripple effect cu un proyecto di e magnitud aki lo trece un ripple effect enorme pa pariba di nos isla, cuminsando cu un 500 pa 600 hende cu lo keda pariba pa traha.

Hendenan cu aworaki ta traha pabou y na caminda pa cas nan ta cumpra na un supermercado of tienda pabou, pero ora e hotel ta cla nan lo keda pariba y cumpra pariba tambe.

Esaki ademas di e bentahanan ariba menciona pa loke ta trata diferente negoshi nobo cu lo bin. Aki el a menciona e mehoracionnan cu lo tuma lugar na Zeewijk pa crea e posibilidadnan pa watersportnan, tambe e posibilidadnan pa un Rogers Beach por wordo utiliza mas y un Baby Beach cu lo wordo ekipa cu loke ta necesario. Minister Otmar Oduber a bisa cu a scoge pa un modelo pa inicia cu e spin off na San Nicolas. Un persona cu ta keda na un all inclusive no ta keda tur su estadia eyden y cumpra solamente na e tiendanan di e propiedad, e ta sali sigur y pesey ta trahando tambe riba e centro di San Nicolas.

Ya caba inversionnan ta wordo haci, a percura pa monumentonan wordo restaura, oficinanan di Gobierno bay pariba y henter e area di e prome parti di centro di San Nicolas ya caba ta contrata, tanto AIB como compania di arkitecto ta bezig cu reconstruccion y renobacion di henter e area for di warda di polis te n'e rotonde na ex edificio di DOOV.

Minister Otmar Oduber ta bisa cu realidad di bida ta cu mester crea varios instrumento cu ta bay man den man, tin cu crea infraestructura, comercio y volumen pa por trece e desaroyo cu San Nicolas merece.